

MESYUARAT KEDUA, PENGGAL KEEMPAT  
PARLIMEN KEEMPAT BELAS  
2021

**HARI SELASA : 26 OKTOBER 2021**

**JAWAPAN-JAWAPAN BAGI PERTANYAAN-PERTANYAAN JAWAB  
LISAN YANG TIDAK DIJAWAB DI DALAM DEWAN  
( SOALAN NO. 7,9, 11 HINGGA NO. 35 )**

**NOTA: [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS TAHUN 2021**

**PERTANYAAN : LISAN**

**DARIPADA : DATO' SRI BUNG MOKTAR BIN RADIN  
[ KINABATANGAN ]**

**TARIKH : 26 OKTOBER 2021 [ SELASA]**

**SOALAN**

**DATO' SRI BUNG MOKTAR BIN RADIN [ KINABATANGAN ]** minta **MENTERI PERUMAHAN DAN KERAJAAN TEMPATAN** menyatakan apakah perancangan pihak Kementerian dalam usaha meningkatkan keselamatan dalam bandar terutama dalam penyediaan Sistem Kamera Litar Tertutup (CCTV) secukupnya di kawasan bandar khususnya di Sandakan.

**JAWAPAN**

**Tuan Yang Dipertua,**

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) bertanggungjawab mengurus dan menyelenggara 968 unit Kamera Litar Tertutup (CCTV) di 45 Pihak Berkuasa Tempatan (PBT) di bawah Program Bandar Selamat yang melibatkan peruntukan berjumlah RM110.9 juta untuk tempoh mulai tahun 2013 hingga 2022. Pemasangan CCTV dilaksanakan di lokasi *hotspot* yang disarankan oleh Polis DiRaja Malaysia (PDRM). Bagi tahun 2021, sejumlah RM16.5 juta telah diluluskan kepada KPKT bagi tujuan pengurusan dan penyelenggaraan 968 unit CCTV tersebut.

Jumlah pemasangan CCTV di Majlis Perbandaran Sandakan (MPS) adalah sebanyak 20 unit yang termasuk penyediaan peralatan/perkakasan untuk menyokong pengoperasian CCTV di bilik kawalan PBT dan bilik kawalan Ibu Pejabat Polis DiRaja Malaysia Daerah Sandakan. Tempoh sewaan MPS ini bermula dari 3 Disember 2015 sehingga 30 Jun 2021.

Untuk makluman Ahli Yang Berhormat juga, kadar jenayah di Daerah Sandakan didapati telah menurun sebanyak 12% iaitu daripada 608 kes pada tahun 2019 kepada 530 kes pada tahun 2020 berdasarkan statistik jenayah yang diperolehi daripada Ibu Pejabat Polis DiRaja Malaysia Daerah Sandakan. Berdasarkan perkembangan ini, KPKT akan meneruskan kerjasama dengan Polis DiRaja Malaysia (PDRM) untuk mengenal pasti kawasan *hotspot* baharu bagi memastikan impak positif pemasangan CCTV ini berterusan bagi mengurangkan kadar jenayah di kawasan PBT.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB DATUK SERI TIONG KING SING (BINTULU)**

**TARIKH : 26 OKTOBER 2021 (SELASA)**

**SOALAN**

**DATO' SERI TIONG KING SING [ BINTULU ]** minta **MENTERI DALAM NEGERI** menyatakan :-

(a) apakah status terkini dan perancangan Kementerian dalam usaha menaik taraf gred, kekuatan pasukan dan bangunan Ibu Pejabat Polis Daerah Bintulu; dan

(b) apakah perancangan menaik taraf Balai Polis Tanjung Kidurong dan Pondok Polis Daerah Sebauh akan dilaksanakan.

**JAWAPAN**

Tuan Yang Di Pertua,

Kerajaan sentiasa prihatin mengenai prasarana setiap agensi di bawah Kementerian Dalam Negeri (KDN), termasuklah yang melibatkan Polis Diraja Malaysia (PDRM). Kementerian Dalam Negeri (KDN) mengambil perhatian mengenai perancangan naik taraf Ibu Pejabat Polis Daerah (IPD) Bintulu, Balai Polis Tanjung Kidurong dan Pondok Polis Daerah Sebauh. Pada masa ini, Balai Polis Tanjung Kidurong dan Pondok Polis Daerah Sebauh terletak di bawah pentadbiran Ibu Pejabat Polis Daerah (IPD) Bintulu. Manakala Kementerian ini melalui PDRM telah meneliti dan mengangkat permohonan untuk menaiktaraf IPD Bintulu, Balai Polis Tanjung Kidurong dan Pondok Polis Daerah Sebauh sebagai usaha untuk meningkatkan kualiti penyampaian perkhidmatan polis kepada masyarakat di kawasan-kawasan tersebut.

Untuk makluman Yang Berhormat perancangan bagi pembangunan sesebuah projek di bawah Kementerian Dalam Negeri, termasuk baik pulih balai dan pondok polis adalah ditentukan berdasarkan prioriti dan kriteria-kriteria keutamaan mengikut kemampuan kewangan Kerajaan. Dalam hal ini, keperluan pembangunan atau naik taraf balai polis ini akan dikaji mengikut keutamaan bagi dipertimbangkan di dalam *Rolling Plan* (RP) 3, Rancangan Malaysia (RMK) Ke-12 Tahun 2023.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN ANYI NGAU [ BARAM ]**

**TARIKH : 26 OKTOBER 2021 (SELASA)**

**SOALAN**

**TUAN ANYI NGAU** minta **KEMENTERIAN KESIHATAN** menyatakan apakah klinik-klinik di kawasan pedalaman akan terus dibuka sebagai PICK agar individu-individu yang anti vaksin diberi peluang untuk divaksinasi.

**JAWAPAN**

Tuan Yang di-Pertua,

1. Untuk makluman, Program Imunisasi COVID-19 Kebangsaan (PICK) akan diteruskan di klinik swasta yang terpilih. Bagi individu yang masih belum mendapatkan vaksin COVID-19, individu tersebut boleh mendaftar melalui aplikasi MySejahtera dan temujanji akan diberikan mengikut lokasi klinik swasta berdekatan. Maklumat terkini mengenai klinik swasta yang terpilih boleh didapati di Jabatan Kesihatan Negeri (JKN) atau Pejabat Kesihatan Daerah masing-masing.
2. Bagi negeri Sarawak khususnya, Program Imunisasi COVID-19 Kebangsaan (PICK) akan diteruskan di fasiliti kesihatan termasuk klinik-klinik di pedalaman. Bagi individu yang masih belum mendapatkan vaksin COVID-19, boleh menghubungi fasiliti kesihatan terdekat bagi mendapatkan tarikh temujanji. Pemberian imunisasi bagi mereka yang berada di pedalaman akan diatur mengikut keperluan setempat sama ada di klinik-klinik kesihatan terdekat atau pun melalui program jangka luar (*outreach*). Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN NOOR AMIN BIN AHMAD (KANGAR)**

**TARIKH JAWAPAN : 26 OKTOBER 2021 (SELASA)**

**SOALAN**

minta **MENTERI PERPADUAN NEGARA** menyatakan jumlah pertemuan dengan pemimpin agama selain Islam di setiap negeri dibuat mengikut tahun dan apakah perkara yang dibincangkan. Tidak ada institusi khusus mengawal selia keperluan hal ehwal agama bukan Islam. Adakah peruntukan tertentu khusus untuk memenuhi keperluan mereka.



**JAWAPAN**

1. Kementerian Perpaduan Negara telah mewujudkan Jawatankuasa Keharmonian Antara Penganut Agama (HARMONI) selain Islam di pada 14 Ogos 2020.
2. Jawatankuasa HARMONI selain Islam yang dipengerusiakan oleh **YB Menteri Perpaduan Negara dan dianggotai oleh 14 orang pemimpin badan-badan agama** atau wakil pertubuhan yang dikenalpasti dan dilantik oleh Kementerian Perpaduan Negara.
3. Komposisi Ahli Jawatankuasa HARMONI selain Islam adalah seperti berikut:

<b>BIL.</b>	<b>AGAMA</b>	<b>BILANGAN</b>
1	KRISTIAN	4
2	BUDDHA	4
3	HINDU	2
4	SIKH	1
5	TAO	2
6	BAHA'I	1
<b>JUMLAH</b>		<b>14</b>

**JAWATANKUASA KEHARMONIAN ANTARA PENGANUT AGAMA (HARMONI) BERSAMA JAKIM**

4. Jawatankuasa ini merupakan satu-satunya **platform yang diwujudkan untuk merapatkan jurang antara badan-badan agama Islam dan bukan Islam** serta berkongsi pandangan yang memberi manfaat kepada kesejahteraan masyarakat dan negara.

5. Jawatankuasa **HARMONI bersama JAKIM** terdiri daripada:
- i. Pengerusi bersama:  
**YB Menteri Perpaduan Negara dan YB Menteri di Jabatan Perdana Menteri (Hal Ehwal Agama); dan**
  - ii. **24 orang pemimpin badan-badan agama atau wakil pertubuhan** yang dikenalpasti dan disenarai pendek oleh Kementerian Perpaduan Negara dan JAKIM.
6. Komposisi **Ahli Jawatankuasa HARMONI bersama JAKIM** adalah seperti berikut:

<b>BIL.</b>	<b>AGAMA</b>	<b>BILANGAN</b>
1	ISLAM	10
2	KRISTIAN	4
3	BUDDHA	4
4	HINDU	2
5	SIKH	1
6	TAO	2
7	BAHA'I	1
JUMLAH		24

7. **Fungsi** Jawatankuasa HARMONI adalah seperti berikut:
- i. Membentuk platform pemimpin badan agama, atau persatuan agama serta lain-lain pihak berkaitan;
  - ii. memantapkan iklim perhubungan yang baik dalam kalangan pemimpin serta penganut pelbagai agama berteraskan semangat saling hormat menghormati dan bekerjasama di semua peringkat;

**SOALAN NO. : 12**

- iii. menggalakkan semua penganut agama memahami dan menghormati Perlembagaan Persekutuan;
  - iv. meningkatkan penghayatan rakyat kepada nilai-nilai agama selaras dengan Prinsip Rukun Negara; dan
  - v. meningkatkan kefahaman mengenai kepelbagaian agama, budaya dan adat resam agar menjadi sumber kekuatan negara dan masyarakat.
  - vi. Membantu menyelesaikan konflik atau salah faham berkaitan isu agama melalui kaedah intervensi dan mediasi.
8. Di peringkat negeri pula, terdapat **14 negeri yang mempunyai jawatankuasa bagi menguruskan hal ehwal agama selain Islam**. Jawatankuasa peringkat negeri ini dipengerusikan oleh EXCO yang memegang portfolio perpaduan kaum di negeri masing-masing. Senarai jawatankuasa tersebut adalah seperti di lampiran.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS, TAHUN 2021**

**PERTANYAAN : JAWAB LISAN**

**DARIPADA : PUAN RUSNAH BINTI ALUAI [TANGGA BATU]**

**TARIKH : 26 OKTOBER 2021 (SELASA)**

**SOALAN**

**PUAN RUSNAH BINTI ALUAI [ TANGGA BATU ]** minta **MENTERI SUMBER MANUSIA** menyatakan pendirian Kerajaan untuk menaikkan gaji minimum pada kadar RM1200 sebulan memandangkan ramai rakyat yang terbeban akibat pandemik ini.

**JAWAPAN**

**Tuan Yang di-Pertua,**

Kerajaan telah menguatkuasakan Perintah Gaji Minimum (PGM) 2020 mulai 1 Februari 2020 dengan kadar gaji minimum RM1,200 sebulan di 56 kawasan Majlis Bandaraya dan Majlis Perbandaran. Manakala kadar gaji minimum bagi kawasan-kawasan lain ialah RM1,100 sebulan. Buat masa sekarang, Kementerian Sumber Manusia sedang dalam proses untuk membuat pindaan PGM 2020 bagi menaikkan kadar gaji minimum daripada RM1,100 ke RM1,200 sebulan secara *blanket approval* untuk kawasan Majlis Daerah yang telah dinaik taraf kepada Majlis Perbandaran.

Dalam masa yang sama, Kajian Semula PGM 2020 sedang dilaksanakan selaras dengan peruntukan seksyen 25 Akta Majlis Perundingan Gaji Negara 2011 [Akta 732] yang menghendaki kajian semula PGM dilaksanakan sekurang-kurangnya sekali dalam setiap dua tahun. Dalam membuat kajian semula PGM, Jawatankuasa Teknikal Perundingan Gaji Negara (JTPGN) mengadakan perundingan awam dan sesi libat urus yang melibatkan wakil-wakil majikan, pertubuhan majikan, wakil pekerja, kesatuan sekerja dan orang awam bagi mendapatkan input tentang impak pelaksanaan gaji minimum ke atas sosiokonomi negara.

MPGN sentiasa menggunakan pendekatan seimbang (*balanced approach*) dengan meneliti kepentingan pihak majikan, pekerja dan kerajaan untuk menilai kesan pandemik COVID-19 ke atas pemain industri. Peningkatan kadar gaji minimum yang terlalu tinggi boleh mengurangkan minat pelabur asing untuk masuk ke negara ini lalu menjejaskan daya saing negara. Akibatnya pasaran buruh akan berdepan dengan cabaran untuk mencipta pekerjaan baharu yang berkualiti dan berkemahiran tinggi. Kenaikan kadar gaji

### **SOALAN NO: 13**

minimum perlu dilaksanakan secara berperingkat agar tidak memberi tekanan dan membebankan majikan, terutama bagi perusahaan mikro, kecil dan sederhana. Kenaikan kadar gaji minimum yang mendadak boleh menjejaskan operasi syarikat dan mendedahkan pekerja kepada risiko kehilangan pekerjaan.

Proses kajian semula turut mengambil kira indikator-indikator sosioekonomi seperti pendapatan garis kemiskinan, penengah gaji (keupayaan majikan untuk membayar gaji), kadar pengangguran, produktiviti buruh dan perubahan indeks harga pengguna yang mencerminkan kos sara hidup. Dapatan kajian ini akan dibincangkan di peringkat Majlis Perundingan Gaji Negara (MPGN) untuk tujuan membuat syor tentang kadar dan liputan gaji minimum untuk dipertimbangkan dan diputuskan oleh Kerajaan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS TAHUN 2021**

**PERTANYAAN : LISAN**

**DARIPADA : PUAN MARIA CHIN BINTI ABDULLAH  
[ PETALING JAYA ]**

**TARIKH : 26 OKTOBER 2021 [ SELASA]**

**SOALAN**

**PUAN MARIA CHIN BINTI ABDULLAH [ PETALING JAYA ]** minta **MENTERI PERUMAHAN DAN KERAJAAN TEMPATAN** menyatakan mengapa sampai sekarang tidak ada "*follow-up*" rancangan untuk membaiki dan langkah pencegahan masalah-masalah yang dihadapi oleh penduduk-penduduk di PPR seperti masalah persekitaran (sampah terkumpul, kerosakan kemudahan, kekurangan tempat letak kereta, dan lain-lain).

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) sentiasa peka dan prihatin terhadap permasalahan dan masalah persekitaran yang dihadapi penduduk-penduduk di PPR. Sehingga 30 September 2021 terdapat 154 projek (97,196 unit) rumah PPR telah siap dibina oleh KPKT. Daripada jumlah tersebut sebanyak 54 projek rumah *landed* manakala 100 projek rumah pangsapuri.

**Pengurusan PPR di bawah KPKT**

Untuk makluman Ahli Yang Berhormat, daripada 100 projek PPR rumah pangsapuri tersebut, sebanyak lapan (8) PPR diuruskan dan diselenggara oleh KPKT. Sebanyak 92 PPR pula adalah di bawah pengurusan Kerajaan Negeri melalui SUK Perumahan Negeri atau Lembaga Perumahan Negeri masing-masing.

Bangunan rumah PPR yang diuruskan oleh KPKT diselenggara mengikut tatacara pengurusan aset tak alih bagi bangunan-bangunan Kerajaan yang meliputi skop kerja seperti berikut:

- i) pengurusan pentadbiran bangunan dan sewaan;
- ii) pengurusan kebersihan bangunan dan landskap;
- iii) pengurusan dan penyenggaraan sistem elektrik dan mekanikal;
- iv) pengurusan dan penyenggaraan sistem pembentungan;
- v) pengurusan dan kawalan serangga makhluk perosak; dan
- vi) pengurusan kawalan keselamatan.



Pemantauan secara berkala setiap bulan dilaksanakan oleh Ejen Pengurusan dan Penyenggaraan Bangunan yang dilantik oleh KPKT bagi memastikan pengurusan dan kerja-kerja pembaikan PPR dapat dilaksanakan secara teratur dan berjadual.

Pada tahun 2020, kos penyenggaraan yang dibelanjakan oleh KPKT bagi 8 PPR di bawah seliaan Kementerian ini adalah berjumlah RM5.9 juta iaitu sebanyak RM2.2 juta daripada peruntukan Belanja Mengurus dan RM3.7 juta daripada peruntukan Tabung PPR Dimiliki. Namun begitu, peruntukan tambahan diperlukan daripada Kerajaan Persekutuan bagi menampung kos penyenggaraan PPR yang semakin meningkat setiap tahun.

**Pengurusan PPR di bawah SUK Perumahan Negeri atau Lembaga Perumahan Negeri**

Untuk makluman Ahli Yang Berhormat juga, bagi PPR yang diuruskan oleh kerajaan negeri melalui SUK Perumahan Negeri atau Lembaga Perumahan Negeri, kos penyenggaraan rumah PPR dikenakan ditampung melalui yuran penyenggaraan yang dibayar oleh penghuni sendiri di samping peruntukan tambahan yang disalurkan oleh pihak kerajaan negeri kepada agensi penyelaras PPR negeri.

KPKT juga turut menyediakan bantuan penyenggaraan melalui Program Penyenggaraan Perumahan (PPP) bagi membantu kerajaan negeri untuk menampung kos penyenggaraan di perumahan awam strata. Sejak 2016 hingga Oktober 2021, sejumlah RM164,202,551.54 meliputi 232 projek telah diperuntukan di bawah PPP kepada pihak kerajaan negeri di seluruh negara.

**Inisiatif MyBeautiful Keluarga Malaysia, Penilaian Indeks PPR Berdaya Huni dan Komuniti Sifar Sisa (KOSIS).**

Untuk makluman Ahli Yang Berhormat, antara perancangan lain Kerajaan bagi menangani isu ini, KPKT juga akan memperkenalkan inisiatif baharu yang dikenali sebagai **MyBeautiful Keluarga Malaysia** bagi meningkatkan imej perumahan berstrata jenis kos rendah awam yang tidak mempunyai (Badan Pengurusan Bersama (JMB)/ Jawatankuasa Pengurusan (MC). Melalui inisiatif ini sebanyak 68 projek yang melibatkan 35 skim perumahan telah dikenal pasti untuk dibaik pulih dan disenggara dengan melibatkan kos sebanyak RM14.95 juta

Selain itu, inisiatif lain yang akan dilaksanakan oleh KPKT adalah melalui program **Penilaian Indeks PPR Berdaya Huni**. Program ini merupakan satu platform kepada komuniti PPR Malaysia untuk mengenal pasti amalan terbaik dalam mengawal selia pengurusan PPR dalam kalangan komuniti PPR.

Selain itu Penilaian Indeks PPR Berdaya Huni ini juga dilaksanakan bertujuan untuk:

- i) menggalakkan idea inovasi dan kecemerlangan dalam mewujudkan komuniti PPR yang mampan dan lestari;
- ii) mewujudkan integrasi dan kerjasama pelbagai pihak ke arah kemampanan komuniti dalam satu-satu PPR;
- iii) memudah cara program libat urus bersama pemegang taruh dan komuniti PPR; dan
- iv) mewujudkan penilaian yang konsisten dan standard untuk diguna pakai di projek PPR seluruh Malaysia.

Lima (5) prinsip utama yang akan diteraskan dalam Penilaian Indeks PPR Berdaya Huni adalah:

1. kepimpinan berpandangan jauh dan tadbir urus yang baik;

2. pewujudan peluang kebersamaan ekonomi;
3. peningkatan kehidupan bermasyarakat;
4. pemerkasaan tanggungjawab kepada alam sekitar; dan
5. sokongan kepada idea inovasi dan kecemerlangan.

KPKT juga turut melaksanakan Program *Zero Waste Community* (ZeComm) yang dijenamakan semula sebagai **Komuniti Sifar Sisa (KOSIS)** bagi menangani isu-isu berkaitan kebersihan selaras dengan Dasar Komuniti Negara untuk mendaya upaya komuniti setempat.

Pelaksanaan inisiatif KOSIS melalui SWCorp merupakan platform bagi membantu rakyat termasuklah penduduk di PPR melalui konsep menjana pendapatan melalui sisa di mana penduduk boleh menghantar sisa kitar semula seperti plastik, kertas, logam, *household hazardous waste (aerosols, motor oil dan paint supplies)* termasuk sisa makanan dan minyak masak terpakai.

Sehingga September 2021, jumlah pengumpulan barangan kitar semula secara keseluruhannya adalah sebanyak 105,312 kg (RM35,168) yang melibatkan penglibatan sebanyak 3,124 unit rumah dan memberi manfaat kepada hampir 12,496 orang penduduk.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB PUAN WONG SHU QI [KLUANG]**

**TARIKH : 26 OKTOBER 2021 (SELASA)**

**SOALAN**

**PUAN WONG SHU QI [KLUANG]** minta **MENTERI DALAM NEGERI** menyatakan jumlah pengguna yang telah berdaftar dengan sistem myIDENTITY serta rancangan untuk meningkatkan keselamatan sistem tersebut daripada penggodaman.

**JAWAPAN**

Tuan Yang Di Pertua,

Untuk makluman Ahli Yang Berhormat, Sistem myIDENTITY adalah sistem perkongsian maklumat yang disediakan oleh Jabatan Pendaftaran Negara (JPN) bagi kemudahan agensi kerajaan untuk menyemak dan mengesahkan maklumat asas individu bagi tujuan berurusan dengan agensi berkenaan. Pengesahan ini sangat diperlukan bagi mengelakkan penggunaan dokumen palsu dan penipuan dalam mendapatkan perkhidmatan di agensi kerajaan. Keselamatan capaian dan data di dalam Sistem myIDENTITY adalah terjamin dengan pelaksanaan aktiviti pengukuhan keselamatan secara berkala seperti *Security Posture Assessment* (SPA). Sehingga kini, sebanyak 104 agensi kerajaan telah diberi kebenaran untuk menggunakan myIDENTITY.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN KARUPAIYA A/L MUTUSAMI  
[ PADANG SERAI ]**

**TARIKH : 26 OKTOBER 2021 ( SELASA )**

**SOALAN**

**TUAN KARUPAIYA A/L MUTUSAMI** minta **MENTERI KESIHATAN** menyatakan di kawasan Parlimen Padang Serai terdapat sebuah klinik desa di Karangan. Klinik ini tidak dapat memuatkan pesakit yang datang untuk rawatan. Hal ini kerana populasi penduduk di kawasan tersebut semakin meningkat. Tempat rawatan dan tempat letak kenderaan tidak mampu menampung peningkatan ini. Apa langkah Kementerian dalam menyelesaikan perkara ini.

**JAWAPAN**

Tuan Yang di-Pertua,

1. Kementerian Kesihatan mengambil maklum mengenai kesesakan dan kekangan ruang yang dihadapi di Klinik Kesihatan Karangan. Klinik ini beroperasi sejak tahun 1965 dengan jumlah anggaran kedatangan 200 pesakit sehari.

2. Sebagai langkah jangka masa panjang, Kementerian Kesihatan akan mengkaji kesesuaian tapak untuk membina sebuah Klinik Kesihatan baharu yang boleh menyediakan perkhidmatan kesihatan yang komprehensif. Pada masa ini penduduk di Karangan juga mendapat perkhidmatan kesihatan yang disediakan di empat (4) buah Klinik Desa yang berhampiran dengan klinik ini iaitu:

- (a) Klinik Desa Sungai Kob;
- (b) Klinik Desa Sedim;
- (c) Klinik Desa Bikan; dan
- (d) Klinik Desa Batu Putih.

*Catatan: Jarak dari Klinik Kesihatan Karangan ke Hospital Kulim (Hospital Rujukan) ialah 15 km.*

3. Selain itu, pada masa ini, Klinik Kesihatan Jenis 2 Padang Serai yang juga terletak di Kawasan Parlimen Padang Serai sedang dalam pembinaan dengan jarak 22 km dari Klinik Kesihatan Karangan yang mana Klinik Kesihatan ini dibina untuk menggantikan Klinik Kesihatan Padang Serai sedia ada.

4. Selain itu, bagi mengatasi masalah tempat letak kereta, pihak Kementerian Kesihatan juga telah mengenal pasti tanah kosong di dalam Klinik Kesihatan Karangan untuk dijadikan kawasan parkir kereta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS TAHUN 2021**

---

**PERTANYAAN : LISAN**

**DARIPADA : DATO' ABDULLAH SANI BIN ABDUL HAMID  
[ KAPAR ]**

**TARIKH : 26 OKTOBER 2021 (SELASA)**

**SOALAN**

**DATO' ABDULLAH SANI BIN ABDUL HAMID [ KAPAR ]** minta  
**MENTERI PERDAGANGAN DALAM NEGERI DAN HAL EHWAL  
PENGGUNA** menyatakan komitmen Kerajaan memastikan harga  
pasaran barangan keperluan berada ditahap "mampu beli".

**JAWAPAN**

**Tuan Yang di-Pertua,**

Untuk makluman Ahli Yang Berhormat, penentuan harga barangan adalah berdasarkan permintaan dan penawaran. Walau bagaimanapun, Kementerian terus komited untuk memastikan harga barangan terutamanya barang-barang keperluan berada dalam keadaan stabil dan tidak membebankan pengguna.

KPDNHEP dari semasa ke semasa terus mengadakan sesi libat urus dan rundingan dengan pemain industri agar satu titik pertemuan menang-menang dapat dicapai. Ini terbukti dengan inisiatif Kementerian dalam menangani isu harga dan kecukupan bekalan melibatkan topeng muka, kit ujian sendiri, isu bekalan dan harga bawang merah serta isu harga ayam segar.

Selain itu, Kementerian juga melaksanakan penguatkuasaan dan pemantauan di lapangan. Peniaga yang didapati mengambil keuntungan yang tidak munasabah akan diambil tindakan di bawah Akta Kawalan Harga dan Anti Pencatutan 2011. Kementerian juga melalui Pegawai Pemantau Harga (PPH) memantau harga barangan dan perkhidmatan tertentu. Data harga yang diperolehi dipantau dan dianalisis bagi memastikan harga barangan berada pada tahap yang mampu milik. Usaha-usaha penguatkuasaan pencatutan harga dipergiatkan lagi bagi memastikan tiada pihak yang mengambil peluang keadaan ini.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS (2021)**

**PERTANYAAN : LISAN**

**DARIPADA : TUAN NIK NAZMI BIN NIK AHMAD  
[SETIAWANGSA]**

**TARIKH : 26 OKTOBER 2021 (SELASA)**

**SOALAN**

**TUAN NIK NAZMI BIN NIK AHMAD** minta **MENTERI PERUMAHAN  
DAN KERAJAAN TEMPATAN** menyatakan tentang perancangan pembinaan perumahan PPR dan mampu milik di Lembah Klang bagi menampung permintaan penduduk B40.

**JAWAPAN**

**Tuan Yang di-Pertua,**

Terima kasih atas keprihatinan Ahli Yang Berhormat mengenai perancangan pembangunan PPR dan rumah mampu milik di sekitar Lembah Klang untuk golongan B40.

Untuk makluman Ahli Yang Berhormat, pada masa ini terdapat **27 projek PPR** yang telah siap dibina di **Wilayah Persekutuan Kuala Lumpur** dan ianya merangkumi **34,862 unit** rumah.

Bagi kawasan **Lembah Klang** yang merangkumi kawasan di negeri **Selangor** pula, terdapat **empat (4) projek PPR** yang telah **siap dibina** melibatkan **5,184 unit rumah**. Selain itu, terdapat **dua (2) projek** yang sedang **dalam pembinaan** melibatkan **904 unit** rumah yang dijangka akan siap pada tahun **2023**.

Sehubungan itu, merujuk kepada pertanyaan Ahli Yang Berhormat mengenai perancangan pembinaan PPR di Lembah Klang, pihak KPKT sedia mempertimbangkan sebarang cadangan yang diterima daripada **Kementerian Wilayah Persekutuan** dan juga **Kerajaan Negeri Selangor**. Cadangan tersebut akan diteliti oleh KPKT tertakluk kepada **kesesuaian tapak, keperluan setempat** dan **kedudukan kewangan Kerajaan Persekutuan**. Buat masa ini, terdapat perancangan untuk menambah bilangan projek PPR di Lembah Klang di bawah RMKe-12.

Bagi program **Rumah Mesra Rakyat (RMR)** untuk golongan B40 di bawah Syarikat Perumahan Negara Berhad (SPNB) pula, terdapat **2,254 unit** rumah telah siap dibina, **395 unit** rumah dalam pembinaan dan **80 unit** rumah dalam perancangan di Lembah Klang. Kementerian melalui SPNB juga mempunyai perancangan untuk menambah bilangan rumah RMR di Lembah Klang di bawah RMKe-12.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN M. KULASEGARAN [IPOH BARAT]**

**TARIKH : 26 OKTOBER 2021 (SELASA)**

**SOALAN**

**TUAN M. KULASEGARAN [ IPOH BARAT ]** minta **MENTERI SUMBER MANUSIA** menyatakan polisi dan rancangan Kerajaan untuk memberi peluang baru kepada anak muda yang tercicir untuk mengikuti pendidikan teknikal dan latihan vokasional (TVET).

**JAWAPAN**

**Tuan Yang Di Pertua,**

Kerajaan sentiasa mengambil berat terhadap anak-anak muda yang tercicir untuk mengikuti program TVET. Kementerian Sumber Manusia (KSM) melalui Jabatan Pembangunan Kemahiran (JPK) telah memperkenalkan program Sistem Latihan Dual Nasional (SLDN) Khas semenjak Rancangan Malaysia Ke Sepuluh (RMKe-10) lagi.

Program ini memberi peluang kepada anak-anak muda yang tercicir dari pelajaran mengikuti program TVET. Program SLDN Khas membolehkan pelatih mengikuti 70%-80% latihan di tempat kerja sebenar (syarikat/industri) dan 20%-30% latihan teori di pusat latihan. Bagi menarik minat belia mengikuti program SLDN Khas, Kerajaan telah memperuntukan elauan RM625 sebulan dimana sebanyak RM300/sebulan diberikan kepada perantis, RM200/sebulan diagihkan kepada syarikat dan RM125/sebulan diberikan kepada pusat latihan. Sehingga tahun 2020 sebanyak 30,074 perantis telah mendaftar mengikuti program ini merentasi tahap dan bidang kemahiran.

Selaras dengan intipati dalam pembentangan Belanjawan 2021 oleh YB Menteri Kewangan pada 6 November 2020, Kerajaan turut memperkenalkan Sistem Latihan Dual Nasional Plus dengan elauan bulanan dinaikkan daripada RM625 kepada RM1,000 untuk menggalakkan lebih banyak penglibatan industri melaksanakan program berteraskan TVET. Inisiatif ini melibatkan peruntukan keseluruhan berjumlah RM60 juta dan memberi manfaat kepada 10,000 perantis bagi tahun 2021.

Program SLDN Plus masih menggunakan pendekatan yang sama dimana RM500/sebulan diberikan kepada perantis, RM200 kepada syarikat dan RM300/sebulan kepada pusat latihan. Program ini juga turut dibuka kepada semua masyarakat Malaysia dan tidak terhad kepada golongan yang tercicir sahaja.

## **SOALAN NO : 19**

Selain itu, Kerajaan melalui Jabatan Tenaga Manusia (JTM) sebagai penyedia latihan kemahiran menjalankan program latihan yang ditawarkan kepada lepasan sekolah menerusi 32 buah Institusi Latihan Jabatan Tenaga Manusia (ILJTM) yang terdiri daripada sebuah Institut Teknikal Jepun Malaysia (JMTI), 8 buah Pusat Latihan Teknologi Tinggi (ADTEC), dan 23 buah Institut Latihan Perindustrian (ILP).

JTM sentiasa bersedia menyediakan laluan bagi menggalakkan lebih ramai lepasan sekolah menjalani latihan TVET bagi mendapatkan kemahiran baru, mahupun meningkatkan kemahiran sedia ada secara sepenuh masa dan separuh masa di ILJTM dalam bidang kemahiran teknikal/kejuruteraan bertujuan untuk meningkatkan tenaga kerja berkemahiran dalam pasaran buruh Malaysia.

Kursus-kursus yang ditawarkan di ILJTM adalah terbuka kepada semua peringkat masyarakat yang meliputi golongan belia lepasan Sijil Pelajaran Malaysia (SPM) sehingga kepada golongan pekerja industri. Peluang bagi menjalani latihan di ILJTM adalah terbuka tanpa mengira kaum.

PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS

PERTANYAAN : LISAN

DARIPADA : TUAN SIVAKUMAR VARATHARAJU  
NAIDU [ BATU GAJAH ]

TARIKH : 26 OKTOBER 2021 (SELASA)

**SOALAN**

**TUAN SIVAKUMAR VARATHARAJU NAIDU** minta **MENTERI KESIHATAN** menyatakan mengenai pendekatan yang diambil oleh Kementerian untuk menangani penyakit jarang jumpa dalam jangka pendek dan jangka panjang. Nyatakan jumlah yang telah dibelanjakan oleh Kementerian bagi penyakit jarang jumpa dari tahun 2011 sehingga 2021.

**JAWAPAN**

Tuan Yang di-Pertua,

1. Penyakit jarang jumpa telah didefinisikan sebagai “*a life-threatening and / or chronically debilitating rare condition as listed in the Malaysian Rare Disease List*” (dengan izin), berdasarkan kriteria yang telah ditetapkan seperti dihidapi oleh kurang daripada 1 per 4,000 orang di Malaysia, telah disahkan diagnosisnya dan diluluskan oleh Jawatankuasa Kebangsaan Penyakit Jarang Jumpa untuk dimasukkan ke dalam senarai tersebut.
2. Sehingga kini, sebanyak **474 jenis Penyakit Jarang Jumpa** telah disenaraikan dalam *Malaysian Rare Disease List* yang boleh dirujuk di laman sesawang Kementerian Kesihatan.

3. Kementerian Kesihatan telah mempunyai Pelan Strategik Program Penyakit Jarang Jumpa yang mengandungi komponen pencegahan (*preventive*), rawatan (*curative*) yang terdiri pengurusan klinikal, makmal, *Orphan Drugs* dan *Orphan Product*, rehabilitasi dan sokongan penjagaan sosial serta registri dan penyelidikan. Strategi Pelaksanaan Pelan Strategik Program Penyakit Jarang Jumpa di Malaysia terbahagi kepada dua iaitu :-

**(i) Tindakan Jangka Pendek**

- (a) Mewujudkan satu definisi penyakit jarang jumpa yang standard untuk Malaysia.
- (b) Membangunkan satu senarai penyakit jarang jumpa di Malaysia (*Malaysia Rare Disease List*) berdasarkan kriteria yang telah ditetapkan.
- (c) Membangunkan *Malaysian Guidelines for the Management of Orphan Drugs* yang akan memudahkan proses pendaftaran dan pengimportan *Orphan Drugs*

**(ii) Tindakan Jangka Panjang**

- (a) Menggalakkan penyelidikan dan pembangunan (*Research & Development*) di dalam bidang berkaitan penyakit jarang jumpa.
- (b) Memastikan perundangan dan peraturan ada disediakan untuk melindungi hak dan kepentingan pesakit penyakit jarang jumpa.
- (c) Kerjasama dengan syarikat insurans untuk melindungi pesakit dengan penyakit jarang jumpa.

4. Pihak Kementerian telah berjaya melaksanakan langkah-langkah tindakan jangka pendek dan kini fokus diberi untuk menjayakan tindakan jangka panjang pula. Selain itu, untuk tahun 2022 dan 2023 pula, beberapa aktiviti telah dirancang untuk memantapkan lagi Pelan Strategik ini iaitu :-

- (a) Pembentukan '*written policy*' untuk Program Penyakit Jarang

Jumpa di Malaysia;

- (b) Pemantapan aktiviti untuk mengumpul dana dalam Tabung Amanah Penyakit Jarang Jumpa di Hospital Tunku Azizah Kuala Lumpur dengan kerjasama erat dari NGO dan persatuan terlibat;
- (c) Mengemaskini senarai dan tatacara berkaitan senarai penyakit jarang jumpa berdasarkan Klasifikasi ICD-11; dan
- (d) Pembentukan pangkalan data Penyakit Jarang Jumpa.

Tuan Yang di-Pertua,

5. Kementerian Kesihatan Malaysia memberi penjagaan kesihatan dan kemudahan kepada semua jenis penyakit jarang jumpa berdasarkan keperluan masing-masing :-

- (a) Ada penyakit jarang jumpa yang memerlukan ujian diagnostik dan rawatan sokongan sahaja kerana belum wujud lagi rawatan spesifik;
- (b) Ada penyakit jarang jumpa yang memerlukan rawatan susu khas;
- (c) Ada penyakit jarang jumpa yang lain pula memerlukan ubat-ubatan khas; dan
- (d) Kemudahan rehabilitasi dan sokongan seperti terapi cara kerja, fisioterapi dan sebagainya juga disediakan kepada pesakit penyakit jarang jumpa yang memerlukannya.

6. Setakat ini, rawatan untuk pesakit *Lysosomal Storage Disease* yang masih merupakan “*unmet need*” (dengan izin) yang paling kritikal di kalangan pesakit penyakit jarang jumpa memandangkan mereka memerlukan rawatan *Enzyme Replacement Therapy* (ERT) yang mahal.

7. Dalam memastikan perkhidmatan untuk penyakit jarang jumpa ini berterusan, pihak Kerajaan telah memperuntukkan peruntukan kewangan bagi memastikan pesakit golongan ini tidak terpinggir:-

- (a) sebanyak RM8.5 juta diperuntukkan pada setiap tahun untuk pesakit-pesakit penyakit jarang jumpa yang memerlukan ubat dan susu khas semenjak tahun 2011 sehingga kini;



## SOALAN NO. 20

- (b) sebanyak RM10 juta bagi rawatan *Enzyme Replacement Therapy* (ERT) kepada pesakit telah diperuntukkan pada tahun 2018;
  - (c) sebanyak RM16 juta telah diagihkan kepada Hospital Kuala Lumpur pada tahun 2019 untuk merawat pesakit penyakit jarang jumpa yang merangkumi 6 orang pesakit lama (yang dimulakan rawatannya dari tahun 2018) dan 8 orang pesakit baru;
  - (d) sebanyak RM16.5 juta telah diluluskan untuk tahun 2020 untuk merawat pesakit-pesakit yang bukan sahaja terdiri dari penyakit *Lysosomal Storage Disease* malah penyakit jarang jumpa yang lain seperti *Prader Willi Syndrome*, *cystinosis* dan sebagainya; dan
  - (e) sebanyak RM10 juta peruntukan telah diluluskan pada tahun 2021 untuk kesinambungan rawatan pesakit sedia ada serta untuk memulakan rawatan bagi pesakit yang di dalam senarai menunggu.
8. Dengan peruntukan yang disalurkan itu, sehingga hari ini Kementerian telah menanggung rawatan untuk 71 orang pesakit golongan ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS, TAHUN 2021**

**PERTANYAAN : JAWAB LISAN**

**DARIPADA : TUAN AHMAD FAHMI BIN MOHAMED FADZIL  
[LEMBAH PANTAI]**

**TARIKH : 26 OKTOBER 2021 (SELASA)**

**SOALAN**

**TUAN AHMAD FAHMI BIN MOHAMED FADZIL [LEMBAH PANTAI]** minta **MENTERI SUMBER MANUSIA** menyatakan apakah dasar-dasar Kerajaan untuk memastikan pemandu-pemandu GrabFood, Foodpanda, Delivery (J&T, Lalamove) tidak terkesan dengan akibat pengurangan keperluan perkhidmatan ekonomi gig dalam negara menuju keadaan pasca-pandemik COVID-19.

**Jawapan**

**Tuan Yang Di Pertua,**

Kerajaan sedar pentingnya peranan yang dimainkan oleh perusahaan e-hailing dan p-hailing dalam negara pada masa ini. Pada tahun 2020 sahaja, pertumbuhan ekonomi digital telah berkembang pesat berikutan pandemik COVID-19 yang mewujudkan perniagaan digital baharu, seterusnya memaksa perusahaan tradisional untuk beralih kepada perniagaan dalam talian dan menyaksikan berjuta rakyat Malaysia menggunakan kaedah maya bagi keperluan e-dagang, hiburan dan juga pendidikan.

Walaupun negara menuju ke peralihan fasa daripada pandemik kepada endemik, permintaan dan penawaran terhadap perkhidmatan ekonomi gig ini dijangka akan berterusan. Ini kerana bukan sahaja Malaysia, malahan dunia sedang bergerak ke arah digitalisasi yang sekaligus mewujudkan suasana kerja yang lebih fleksibel.

Oleh itu, Kerajaan telah memperkenalkan MyDIGITAL sebagai satu inisiatif negara yang melambangkan aspirasi Kerajaan untuk mentransformasi Malaysia menjadi negara berpendapatan tinggi yang berpacuan teknologi dan pendigitalan, serta sebagai peneraju serantau dalam ekonomi digital. MyDIGITAL berhasrat membantu rakyat menguasai teknologi untuk meningkatkan kualiti dan taraf hidup.

Visi Rangka Tindakan (Blueprint) Ekonomi Digital Malaysia untuk menjadi peneraju serantau dalam ekonomi digital dan mencapai pembangunan sosioekonomi. Inisiatif MyDIGITAL adalah penanda aras yang kritikal untuk merealisasikan Rancangan Malaysia Kedua Belas, 2021-2025 (RMKe-12), seiring dengan usaha menuju Wawasan Kemakmuran Bersama 2030.

Buat masa sekarang, Kementerian Sumber Manusia melalui Pertubuhan Keselamatan Sosial (PERKESO) menyediakan perlindungan keselamatan sosial di bawah Akta Keselamatan Sosial Pekerjaan Sendiri 2017 [Akta 789] bagi individu-individu yang bekerja sendiri, termasuklah

pekerja gig. Akta 789 ini telah dikuatkuasakan mulai 1 Jun 2017 yang kini meliputi 20 sektor atau perusahaan di Malaysia.

Bagi menjamin anak muda yang terlibat dalam ekonomi gig ini terus terbela, peraturan-peraturan mengenai pekerja yang menjalankan perkhidmatan pengangkutan dan penghantaran barangan atau makanan telah pun dikuatkuasakan mulai 1 Oktober 2021. Penguatkuasaan ini dijangka dapat menarik lebih ramai kumpulan sasar menyertai perlindungan yang disediakan oleh Akta 789.

Inisiatif perlindungan keselamatan sosial pekerjaan sendiri diberikan kepada Orang Bekerja Sendiri (OBS) yang mengalami kemalangan atau kematian semasa menjalankan aktiviti pekerjaannya. Berdasarkan statistik pencarum PERKESO, sehingga 24 September 2021, seramai 13,333 OBS dilindungi di bawah program Penjana Gig, manakala di bawah SPS Lindung pula, seramai 194,800 OBS.

Kementerian Sumber Manusia juga sedang menjalankan sesi libat urus bersama penyedia-penyedia platform gig bagi mendapatkan maklum balas atau pandangan berhubung cadangan penggubalan rang undang-undang pekerja gig supaya tidak menjejaskan keunikan pekerjaan gig itu sendiri.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN NOOR AMIN BIN AHMAD  
[KANGAR]**

**TARIKH : 26 OKTOBER 2021 (SELASA)**

**SOALAN**

Minta **MENTERI BELIA DAN SUKAN** menyatakan jenis insentif pendanaan (seperti pengecualian cukai) yang boleh dimanfaatkan oleh persatuan-persatuan sukan dan permainan yang ada dalam negara. Nyatakan sekali bagaimana proses-prosesnya.

Tuan Yang di-Pertua,

Untuk makluman Ahli Yang Berhormat, Kementerian menerusi Majlis Sukan Negara (MSN) juga telah mewujudkan pelbagai insentif pendanaan berkaitan sukan prestasi tinggi yang boleh dimanfaatkan oleh Persatuan-Persatuan Sukan Kebangsaan (PSK) antaranya adalah:

- a) **Geran Bantuan Pentadbiran Persatuan Sukan Kebangsaan** yang merupakan bantuan kerajaan untuk membantu mengukuhkan tadbir urus persatuan sukan prestasi tinggi agar lebih sistematik dan efisien. PSK yang memohon layak menerima **elaun Pegawai Eksekutif Sukan** (RM1,500.00), **elaun Pengurus Besar** (RM2,000.00), **geran pentadbiran pejabat** (RM5,000.00) dan **bantuan menghadiri seminar/kongres di luar negara (tiket kapal terbang berdasarkan destinasi)**.
- b) **Geran Bantuan Penganjuran Kejohanan** juga disediakan kepada PSK bagi menggalakkan penganjuran kejohanan di pelbagai peringkat secara kompetitif. Kadar bagi penganjuran kejohanan adalah seperti berikut:
  - **Kejohanan Kebangsaan** adalah di antara RM30,000.00 ke RM50,000.00;
  - **Kejohanan Remaja Kebangsaan** di antara RM25,000.00 ke RM30,000.00; dan
  - **Kejohanan Negeri** di antara RM10,000.00 ke RM15,000.00.
- c) Bagi menggalakkan penajaan dalam pembangunan sukan prestasi tinggi negara, **insentif pengecualian cukai** juga diperkenalkan menerusi MSN. Individu atau badan korporat yang memberikan sumbangan bagi pelaksanaan program dan aktiviti berkaitan **sukan sahaja** akan mendapat **Pengecualian Cukai** yang termaktub di bawah **Seksyen 44(6) Akta Cukai Pendapatan 1967**. Para penyumbang/ penaja yang memberikan sumbangan/derma dalam bentuk wang tunai sahaja layak mendapat tolakan dalam pengiraan pendapatan agregat (kadar pengecualian adalah terhad **7% daripada**

**pendapatan agregat kepada individu dan 10% daripada pendapatan agregat kepada syarikat).**

Tatacara memohon pengecualian cukai oleh penaja adalah seperti berikut:

- i. **Penerima sumbangan (badan sukan)** perlu memohon kebenaran menggunakan **AKAUN SUMBANGAN** melalui MSN.
- ii. **MSN akan meneliti dan mengeluarkan surat kebenaran kepada Badan sukan.**
- iii. **Badan sukan membuat penyelarasan tuntutan wang tajaan daripada MSN** selepas menerima makluman secara bertulis daripada pihak penaja.
- iv. **Resit Pengecualian Cukai** akan dikeluarkan oleh MSN dalam tempoh **14 hari bekerja sebelum wang tajaan disalurkan kepada badan sukan tersebut.**

Melalui pemberian insentif ini, KBS berharap agar Persatuan-Persatuan Sukan Kebangsaan (PSK) ini dapat memberikan sumbangan kembali kepada negara dalam membantu Kerajaan memperkasakan lagi pembangunan industri sukan di Malaysia. Melihat kepada pembangunan sukan di dalam negara, **Sektor industri sukan** di Malaysia sewajarnya diberi **perhatian serius memandangkan keupayaannya untuk menyumbang secara signifikan kepada ekonomi Malaysia.** Selain itu, Kerajaan juga berharap agar persatuan sukan ini dapat mengetengahkan bakat-bakat baru yang bakal memberi saingan yang hebat di temasya sukan bertaraf dunia yang secara tidak langsung dapat **memperkasakan sektor industri sukan** di negara ini

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB DATO' DR MUJAHID YUSOF B. RAWA (PARIT  
BUNTAR)**

**TARIKH : 26 OKTOBER 2021 (SELASA)**

**SOALAN**

**DATUK SERI DR. MUJAHID BIN YUSOF RAWA [PARIT BUNTAR]** minta  
**MENTERI DALAM NEGERI** menyatakan ancaman golongan pengganas  
dan kaitannya dengan rangkaian luar negara.



**JAWAPAN**

Tuan Yang Di Pertua,

Pendirian Kerajaan terhadap isu keganasan adalah sangat jelas, iaitu tidak menerima sebarang bentuk perlakuan atau tindakan yang melibatkan keganasan, sama ada yang dilakukan oleh seseorang individu atau sesebuah kumpulan.

Dari segi ancaman, Malaysia masih lagi selamat daripada sebarang serangan keganasan dan cubaan melakukan perbuatan keganasan kerana kecekapan pihak Polis Diraja Malaysia (PDRM) sama ada dalam menghalang sebelum berlakunya sesuatu insiden keganasan atau langkah pencegahan awal deradikalisme kepada individu-individu yang dikenalpasti.

Untuk makluman Ahli Yang Berhormat, keganasan merupakan salah satu jenayah rentas sempadan, justeru sebarang usaha untuk mewujudkan rangkaian keganasan di Malaysia akan dibanteras dengan segera, termasuk usaha menjadikan Malaysia sebagai transit ke wilayah yang berkonflik. Pihak PDRM sentiasa melakukan pemantauan ke atas mana-mana kumpulan dan individu yang didapati cuba menggugat keselamatan negara dan ketenteraman awam.

Selain itu, Kementerian juga turut mengadakan kerjasama antarabangsa bagi memastikan tiada sebarang serangan keganasan atau cubaan melakukan perbuatan keganasan antara lainnya seperti:

1. *ASEAN Senior Officials Meeting on Transnational Crime (SOMTC)*;
2. *ASEAN Regional Forum (ARF)*;
3. *ASEAN-Japan Dialogue on Counter-Terrorism*; dan
4. *Asia-Europe Meeting (ASEM)*.

Kementerian juga sedang membangunkan Pelan Tindakan Kebangsaan Bagi Mencegah Dan Menangani Fahaman Pelampau Keganasan (*National Action Plan to Prevent and Counter Violent Extremism, NAPPCVE*).

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS TAHUN 2021**

---

**PERTANYAAN : LISAN**

**DARIPADA : DR. ONG KIAN MING [BANGI]**

**TARIKH : 26 OKTOBER 2021 (SELASA)**

**SOALAN**

**DR. ONG KIAN MING [ BANGI ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan status terkini Rang Undang-undang Perkhidmatan Penyelenggaraan dan Pembaikan Kenderaan Motor dan apakah proses “*stakeholder consultation*” yang telah dan sedang dijalankan.

**JAWAPAN**

**Tuan Yang di-Pertua,**

1. Rang Undang-Undang (RUU) Perkhidmatan Penyelenggaraan dan Pembaikan Kenderaan Motor telah dicadangkan oleh Kerajaan berdasarkan keputusan Jemaah Menteri pada 4 September 2002 supaya diperkenalkan Akta Penyelenggaraan dan Membaik Pulih Kenderaan Bermotor dan diletakkan di bawah bidang kuasa Kementerian Perdagangan Dalam Negeri dan Hal Ehwal Pengguna.

2. Bermula pada 4 September 2002 hingga April 2019, tidak kurang daripada 30 sesi konsultasi telah dilaksanakan oleh Kementerian melibatkan pelbagai pihak berkaitan industri ini. Antaranya adalah:

- i) Kementerian Perdagangan Antarabangsa dan Industri (MITI);
- ii) Kementerian Pengangkutan (MOT);
- iii) Unit Perancang Ekonomi (EPU);
- iv) Kementerian Sumber Manusia (MOHR);
- v) Jabatan Pengangkutan Jalan (JPJ);
- vi) Jabatan Pembangunan Kemahiran (JPK);
- vii) Pihak Berkuasa Tempatan (PBT);
- viii) Malaysia Automotive Robotic and IoT Institute (MARII);
- ix) Jabatan Alam Sekitar (JAS);
- x) Jabatan Standard (DOSM);
- xi) Malaysian Automotive Association (MAA);
- xii) The Federal of Automobile Workshop Owners' Association of Malaysia (FAWOAM);
- xiii) Federation of Engineering and Motor Parts Traders' Associations, Malaysia (FEMPTAM);
- xiv) Persatuan Pengimport dan Peniaga Kenderaan Melayu Malaysia (PEKEMA); dan

xv) Persatuan Pengusaha Industri-Industri Bengkel Malaysia (PPIBM).

3. Setelah meneliti maklum balas serta dapatan yang diperoleh sepanjang sesi libat urus tersebut, Kementerian telah memutuskan bahawa cadangan RUU ini tidak diteruskan. Antaranya isu yang dibangkitkan adalah pertindihan kuasa dengan Pihak Berkuasa Tempatan (PBT) terutama aspek perlesenan yang akan menyukarkan dari segi pelaksanaan dan penguatkuasaan. Nota Jemaah Menteri (NJM) berkenaan perkara ini juga telah dibentangkan dalam Mesyuarat Jemaah Menteri pada 24 Julai 2019 yang bersetuju bahawa RUU ini tidak diteruskan.

4. Walaupun RUU ini tidak diteruskan, Kementerian sedang dalam peringkat akhir membuat pindaan ke atas Peraturan-Peraturan Pelindungan Pengguna (Pendedahan Maklumat Bengkel) 2002. Proses “stakeholder consultation” dalam cadangan pindaan Peraturan ini juga telah dijalankan dengan mengadakan pelbagai sesi libat urus melibatkan pemain industri serta persatuan yang berkaitan. Pihak Kementerian berharap melalui penambahbaikan yang dilaksanakan ini dapat meningkatkan kualiti perkhidmatan serta profesionalisme di dalam industri ini dan pada yang sama dapat melindungi hak dan kepentingan pengguna.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB TUAN SIVARASA A/L K.RASIAH (SUNGAI  
BULOH)**

**TARIKH : 26 OKTOBER 2021 (SELASA)**

**SOALAN**

**TUAN R. SIVARASA [ SUNGAI BULOH ]** minta **MENTERI DALAM NEGERI** menyatakan untuk tempoh 1 Januari 2020 sehingga 30 September 2021, di bawah Akta Kesalahan Keselamatan (Langkah-langkah Istimewa) SOSMA 2012, berapa orang ditangkap, berapa di dakwa di Mahkamah (dan kategori kesalahan) dan sama ada Kerajaan bercadang membuat pindaan kepada akta tersebut untuk memastikan proses pengadilan di bawah akta itu adalah serupa dengan Kanun Acara Jenayah dan lebih adil kepada semua pihak khususnya orang dituduh.

**JAWAPAN**

Tuan Yang Di Pertua,

Bagi tempoh 1 Januari 2020 sehingga 30 September 2021, seramai 374 orang telah ditahan di bawah Akta Kesalahan Keselamatan (Langkah - Langkah Khas) 2012 (SOSMA). Daripada jumlah tersebut, pihak Cawangan Khas telah menahan seramai 62 orang yang melibatkan tujuh (7) orang untuk siasatan berkaitan aktiviti keganasan militan dan 55 orang lagi ditahan untuk siasatan berkaitan kesalahan pemerdagangan orang dan penyeludupan migran. Daripada jumlah tersebut, 29 orang telah didakwa di mahkamah iaitu empat (4) didakwa di bawah Seksyen 130JB (1)(a) Kanun Keseksaan dan 25 orang lagi didakwa di bawah Akta Anti Pemerdagangan Orang Dan Antipenyeludupan Migran(ATIPSOM) 2007.

Manakala Jabatan Siasatan Jenayah pula telah menahan seramai 312 orang di bawah Akta Kesalahan Keselamatan (Langkah-Langkah Khas) SOSMA 2012, atas kesalahan Bab VIB Jenayah Terancang Kanun Keseksaan bagi tempoh 1 Januari 2020 sehingga 30 September 2021.

Bagi menjawab soalan berkaitan pindaan terhadap Akta SOSMA 2012 pula, Kerajaan berpandangan bahawa undang-undang ini masih relevan dan penting bagi memelihara ketenteraman awam dan keselamatan negara. Polis Diraja Malaysia (PDRM) masih memerlukan undang-undang sedemikian agar tindakan segera boleh diambil untuk mengelakkan sebarang kegenteran awam, perselisihan antara kaum dan ancaman kepada kesejahteraan rakyat. Walaupun begitu, Kementerian komited untuk menambahbaik undang-undang tersebut dari semasa ke semasa bagi memastikan keamanan dan keselamatan Negara sentiasa terpelihara. Usaha-usaha penambahbaikan terhadap undang-undang tersebut berterusan dari semasa ke semasa.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB TUAN RAMKARPAL SINGH A/L KARPAL  
SINGH (BUKIT GELUGOR)**

**TARIKH : 26 OKTOBER 2021 (SELASA)**

**SOALAN**

**TUAN RAMKARPAL SINGH A/L KARPAL SINGH [ BUKIT GELUGOR ]** minta **MENTERI DALAM NEGERI** menyatakan bahawa setakat bulan Oktober, 2021, berapakah jumlah permohonan bagi kewarganegaraan kanak-kanak yang telah dibuat oleh ibu warganegara Malaysia kepada Jabatan Pendaftaran Negara dan daripada jumlah tersebut berapakah jumlah permohonan yang telah diluluskan dan ditolak.

**JAWAPAN**

Tuan Yang Di Pertua,

Berdasarkan rekod Jabatan Pendaftaran Negara (JPN) dari tahun 2018 sehingga 11 Oktober 2021, sebanyak 2,352 permohonan yang dibuat oleh pemohon ibu bertaraf warganegara Malaysia dan sebanyak 21 permohonan telah dianugerahkan kewarganegaraan dan 31 permohonan telah ditolak.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS, TAHUN 2021**

**PERTANYAAN : LISAN**

**DARIPADA : TUAN CHARLES ANTHONY SANTIAGO  
[ KLANG ]**

**TARIKH : 26 OKTOBER 2021 (SELASA)**

**SOALAN**

**TUAN CHARLES ANTHONY SANTIAGO [ KLANG ]** minta **MENTERI SUMBER MANUSIA** menyatakan mengapa Kerajaan masih melengahkan pembentangan pindaan Akta Kesatuan Sekerja dan Akta Kerja di Dewan Rakyat. Mohon cadangkan garis masa untuk pembentangan pindaan kedua-dua rang undang-undang tersebut di Dewan Rakyat.

**JAWAPAN**

**Tuan Yang di-Pertua,**

Proses meminda atau menggubal sesuatu undang-undang memerlukan penelitian yang menyeluruh dengan mengambil kira kepentingan semua pihak termasuklah pihak majikan dan pekerja. Kementerian Sumber Manusia tidak pernah melengahkan-lengahkan usaha meminda kedua-dua Akta ini namun pelaksanaannya perlu dibuat secara komprehensif dan inklusif.

Pindaan ke atas Akta Kesatuan Sekerja 1959 [Akta 262] sedang dalam peringkat akhir untuk semakan Jabatan Peguam Negara dan dijangka akan dibentangkan dalam sesi Mesyuarat Parlimen pada Disember tahun ini. Manakala Rang Undang-Undang bagi meminda Akta Kerja 1955 [Akta 265] telah dibentangkan di Dewan Rakyat pada sesi Mesyuarat Kedua, Penggal Keempat Parlimen Keempat Belas 2021 untuk bacaan kali pertama pada 25 Oktober 2021.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB TUAN NGA KOR MING (TELUK INTAN)**

**TARIKH : 26 OKTOBER 2021 (SELASA)**

**SOALAN**

**TUAN NGA KOR MING [ TELUK INTAN ]** minta **MENTERI DALAM NEGERI** menyatakan secara terperinci berapa jumlah bilangan kanak-kanak tanpa kerakyatan atau 'stateless children' dalam negara ini mengikut negeri dan apakah langkah-langkah yang sedang diambil oleh Kerajaan untuk mengatasi masalah kronik ini.

**JAWAPAN**

Tuan Yang Di Pertua,

Berhubung dengan rekod individu tanpa kewarganegaraan (*stateless*), adalah dimaklumkan bahawa Kementerian melalui Jabatan Pendaftaran Negara (JPN) hanya merekodkan status seseorang individu sebagai warganegara atau bukan warganegara berdasarkan kepada status perkahwinan dan taraf kewarganegaraan ibu bapa individu sewaktu kelahiran berlaku. Justeru itu, tiada individu yang direkodkan sebagai *stateless* di Malaysia.

Untuk makluman Ahli Yang Berhormat, kelahiran yang berlaku di Malaysia tidak menyebabkan seseorang individu memperoleh kewarganegaraan

Malaysia secara automatik. Kewarganegaraan seseorang individu adalah ditentukan berdasarkan kepada status perkahwinan dan taraf kewarganegaraan ibu bapa kandung individu berkenaan sewaktu kelahiran berlaku selaras dengan peruntukan Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

Bagi kelahiran yang berlaku sebelum pendaftaran perkahwinan ibu bapa mengikut perundangan negara, taraf kewarganegaraan kanak-kanak tersebut adalah mengikut taraf kewarganegaraan ibunya selaras dengan peruntukan undang-undang di bawah Seksyen 17, Bahagian III, Jadual Kedua, Perlembagaan Persekutuan. Dalam hal ini, ibu bapa dan penjaga kepada kanak-kanak berkenaan bertanggungjawab sepenuhnya untuk menguruskan kewarganegaraan, dokumen pengenalan diri dan dokumen perjalanan dengan negara asal bagi memastikan kanak-kanak ini masih boleh menggunakan keistimewaan negara asal ibunya seperti boleh memohon dokumen perjalanan negara asal ibunya sekaligus mengelakkan kanak-kanak berkenaan tiada dokumen pengenalan diri, keberadaan tidak sah di Malaysia dan seterusnya disalah anggap sebagai tidak memiliki kewarganegaraan dari mana-mana negara (*stateless*).

Bagi individu warga asing atau bertaraf bukan warganegara yang berhasrat untuk memohon kewarganegaraan Malaysia, mereka boleh mengemukakan permohonan untuk memperoleh kewarganegaraan Malaysia sama ada melalui pendaftaran atau penaturalisasian, jika telah memenuhi syarat-syarat yang ditetapkan oleh Perlembagaan Persekutuan dan perundangan yang berkaitan dengan pendaftaran perkahwinan, pendaftaran kelahiran serta lain-lain perundangan berkuatkuasa. Sukacita diingatkan bahawa syarat-syarat ini hanya melayakkan permohonan dikemukakan dan tidak menjamin bahawa ia akan diluluskan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS (2021)**

**PERTANYAAN : LISAN**

**DARIPADA : TUAN AKMAL NASRULLAH BIN MOHD.  
NASIR (JOHOR BAHRU)**

**TARIKH : 26 OKTOBER 2021 (SELASA)**

**SOALAN**

**TUAN AKMAL NASRULLAH BIN MOHD. NASIR** minta **MENTERI PERUMAHAN DAN KERAJAAN TEMPATAN** menyatakan usaha untuk menambah baik dan memperluas skim sewa beli hartanah atau Rent-To-Own untuk projek-projek perumahan yang bernilai RM500,000 ke bawah untuk memudahkan proses pemilikan hartanah dalam kalangan anak muda.

**JAWAPAN**

**Tuan Yang di-Pertua,**

Pertama sekali saya mengucapkan terima kasih atas keprihatinan Ahli Yang Berhormat dalam menambah baik dan memperluas skim sewa beli hartanah atau *Rent-To-Own* ini.

**RTO PPR**

Untuk makluman Ahli Yang Berhormat, bagi membantu rakyat B40 memiliki rumah, Kementerian telah melaksanakan Skim Sewa Untuk Dimiliki Atau RTO untuk Program Perumahan Rakyat (PPR). Program merupakan skim pembiayaan mudah yang ditawarkan kepada pemohon atau bakal pembeli yang gagal mendapatkan pembiayaan daripada mana-mana institusi kewangan.

Skim RTO mula diperkenalkan sejak tahun 2017 berikutan majoriti pemohon pinjaman perumahan secara konvensional telah ditolak atas sebab tidak memenuhi kelayakan yang ditetapkan oleh institusi kewangan. Antara kelebihan Skim RTO adalah kadar faedah yang jauh lebih rendah berbanding kadar faedah pinjaman institusi kewangan lain, di samping syarat dan dokumentasi yang diperlukan tidak terlalu ketat (*rigid*) serta membebaskan.

Atas dasar keprihatinan kerajaan bagi membantu rakyat yang terkesan ini, Skim RTO mula diperkenalkan di PPR terpilih dengan kadar sewaan RM205 (*landed*) dan RM205+RM50 penyelenggaraan (pangsapuri) sebulan bagi 20 tahun dengan tempoh percubaan selama dua (2) tahun.

**RTO PR1MA**

Selain Skim RTO yang dilaksanakan di PPR khusus bagi golongan B40, terdapat juga Skim Pembiayaan RTO yang diumumkan dalam Belanjawan Tahun 2021 yang menawarkan skim pembiayaan perumahan alternatif kepada golongan M40. Skim ini merupakan inisiatif kolaborasi

Kementerian Kewangan, KPKT melalui Perbadanan PR1MA Malaysia (PR1MA) bersama institusi kewangan terpilih dan masih dalam penelitian Kementerian Kewangan dan pihak PR1MA.

Skim RTO ini dirancang untuk membantu mengurangkan beban kewangan rakyat M40 yang ingin memiliki rumah semasa pemulihan daripada krisis COVID-19. Ianya akan ditawarkan kepada bakal pembeli yang tidak layak mendapatkan pembiayaan daripada mana-mana institusi kewangan. Pembeli mempunyai pilihan untuk menyewa selama lima (5) tahun dahulu dengan kadar sewa yang berpatutan sebelum membeli rumah tersebut. Dalam tempoh sewaan, bakal pembeli berpeluang untuk memperbaiki kedudukan kewangan mereka sehingga mereka boleh mendapatkan pinjaman bank di kemudian hari.

Skim RTO ini dirancang untuk dibuka kepada pembeli rumah pertama untuk semua rumah PR1MA yang sedang dan telah siap dibina di seluruh negara. Pihak PR1MA kini sedang dalam peringkat perbincangan lanjut dengan Kementerian Kewangan dan institusi kewangan terpilih bagi memuktamadkan draf perjanjian skim RTO.

## **PENUTUP**

Selaras dengan strategi RMKe-12 untuk meningkatkan akses pemilikan Rumah Mampu Milik (RMM), KPKT sedang meneliti beberapa cadangan untuk mencari kaedah bagi mewujudkan satu model pembiayaan perumahan yang lebih bersesuaian dengan keadaan semasa untuk golongan B40 dan M40. Antara faktor-faktor yang perlu diambil kira adalah pembiayaan 100 peratus, kadar faedah yang rendah dan tetap, serta kelonggaran kriteria untuk kelulusan pinjaman.

Sekian, terima kasih.

**PEMBERITAHUAN PERTANYAAN LISAN DEWAN NEGARA  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : DR KELVIN YII LEE WUEN [BANDAR KUCHING]**

**TARIKH : 26 OKTOBER 2021 (SELASA)**

**SOALAN**

**DR KELVIN YII LEE WUEN** minta **MENTERI KESIHATAN** menyatakan jumlah *backlog* prosedur-prosedur atau rawatan kes bukan COVID-19 yang perlu ditangguhkan disebabkan COVID-19 dan berapa telah dipindahkan oleh Kerajaan ke hospital swasta dan berapa kos yang telah dibelanjakan untuk proses tersebut.

**JAWAPAN**

1. Bagi menangani isu kes tertunggak, KKM telah memulakan penyumberluaran perkhidmatan perubatan (pesakit bukan COVID-19) kepada pihak hospital swasta semenjak tahun 2020. Pada tahun 2021 iaitu sehingga 30 September 2021, sebanyak 38 hospital kerajaan dan 71 buah hospital swasta terlibat di dalam perkhidmatan penyumberluaran di seluruh negara, yang mana 8,338 pembedahan dan prosedur perubatan telah berjaya dilaksanakan yang melibatkan perbelanjaan sebanyak RM73.5 juta.

2. Tunggakan kes dan tempoh masa menunggu mendapatkan rawatan telah berjaya dikurangkan melalui inisiatif penyumberluaran ini, walaupun jumlah fasiliti dan kepakaran hospital swasta di beberapa negeri adalah terhad. Sehingga 30 September 2021, terdapat sejumlah 59,049 kes tunggakan bagi kes-kes pembedahan (*surgical based*) dan prosedur perubatan (*medical based*) bukan COVID-19 di fasiliti KKM. Situasi ini dilihat berlaku juga di banyak negara serata dunia, iaitu kesan daripada penularan COVID-19 di mana banyak tumpuan telah diberikan kepada perawatan kes-kes COVID-19, sekaligus mengakibatkan perawatan kes-kes bukan COVID-19 terjejas.

3. Kaedah yang sedang dikaji bagi menyelesaikan isu kes tunggakan adalah seperti berikut:

- (a) memperluas lagi inisiatif penyumberluaran ke hospital-hospital swasta yang lain;
- (b) pembukaan *repurpose* Dewan Bedah di hospital-hospital KKM secara berperingkat;
- (c) memperluas lagi tempoh pengoperasian pembedahan pada hari Sabtu dari 5 jam ke 8 jam, dan jika perlu dilanjutkan ke hari Ahad; dan
- (d) mengadakan perbincangan dengan hospital ATM dan Hospital Pengajar Universiti berkaitan perkara yang boleh dibantu.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB PUAN KHOO POAY TIONG (KOTA MELAKA)**

**TARIKH : 26 OKTOBER 2021 (SELASA)**

**SOALAN**

**TUAN KHOO POAY TIONG [ KOTA MELAKA ]** minta **MENTERI DALAM NEGERI** menyatakan status siasatan dan tindakan yang telah diambil dalam kes kumpulan jenayah Geng Nicky, termasuk jumlah orang yang telah ditahan dan didakwa, aset yang disita, dan sama ada lokasi dalang kumpulan tersebut telah dikesan.



**JAWAPAN**

Tuan Yang Di Pertua,

Terdapat tiga (3) kertas siasatan telah dibuka oleh pihak Polis Diraja Malaysia (PDRM) berkaitan kes suspek yang dinyatakan tersebut serta beberapa orang anggota polis yang didakwa terlibat dengan kes ini. Jabatan Siasatan Jenayah Komersil (JSJK) telah menjalankan siasatan di bawah Seksyen 130V – 130ZB Kanun Keseksaan iaitu jenayah terancang.

Bagi siasatan pertama, seramai 48 orang ahli sindiket dan 3 anggota penguatkuasa telah ditangkap untuk siasatan lanjut. Hasil siasatan telah membawa pertuduhan ke atas 18 orang individu pada 9 April 2021 di bawah seksyen 130V dan 130W Kanun Keseksaan iaitu kesalahan menganggotai kumpulan jenayah terancang dan membantu kumpulan jenayah terancang. Walau bagaimanapun, pada 30 September 2021 kes telah diputuskan DNAA (dilepaskan tanpa dibebaskan). Kes masih dalam siasatan lanjut dan tindakan susulan berdasarkan pandangan lanjut Jabatan Peguam Negara.

Siasatan kedua juga disiasat di bawah Seksyen 130V – 130ZB Kanun Keseksaan. Seramai sembilan (9) orang pegawai penguatkuasa yang merupakan pegawai polis telah ditahan untuk siasatan lanjut.

Siasatan ketiga adalah kes melibatkan Op Pelican 3.0 “Geng Nicky”. Kes disiasat di bawah Seksyen 4(1) Akta Pencegahan Pengubahan Wang Haram, Pencegahan Pembiayaan Keganasan Dan Hasil Daripada Aktiviti Haram (AMLATFPUAA) 2001 iaitu kesalahan terlibat dengan pengubahan wang haram. Seorang suspek telah ditahan untuk siasatan. Setakat ini, kertas siasatan berkenaan telah dirujuk kepada Jabatan Peguam Negara pada 26 Julai 2021 bagi tujuan nasihat dan pandangan untuk tindakan selanjutnya.

Yang Berhormat, suspek utama kes ini juga sedang dikesan oleh pihak PDRM dan memandangkan kesemua kes masih belum selesai, Kementerian tidak berhasrat untuk mengulas lanjut bagi tidak mengganggu siasatan dan proses perundangan.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB PROF. MADYA DR. RUSNAH BT. ALUAI  
(TANGGA BATU)**

**TARIKH : 26 OKTOBER 2021 (SELASA)**

**SOALAN**

**PUAN RUSNAH BINTI ALUAI [ TANGGA BATU ]** minta **MENTERI DALAM NEGERI** menyatakan mengapakah operasi serbuan penempatan rumah kongsi warga asing kerap kali dilakukan dan kenapa tidak majikan yang ditahan dan disoal siasat.

**JAWAPAN**

Tuan Yang Di Pertua,

Untuk makluman Ahli Yang Berhormat, Kementerian Dalam Negeri melalui Jabatan Imigresen Malaysia menjalankan operasi atau pemeriksaan di penempatan-penempatan rumah kongsi warga asing selaras dengan penguatkuasaan undang-undang di bawah Akta Imigresen 1959/63 bagi mengekang aktiviti perlindungan dan penggajian pendatang asing tanpa izin (PATI) di kawasan-kawasan tapak pembinaan, kilang dan juga perladangan.

Kesalahan menggaji PATI adalah satu kesalahan di bawah Seksyen 55B Akta Imigresen 1959/63 yang boleh dikenakan hukuman tidak kurang

RM10,000 tetapi tidak lebih RM50,000 atau penjara tidak lebih 12 bulan atau kedua-duanya sekali bagi setiap orang PATI yang diambil bekerja. Bagi majikan yang menggaji PATI lebih dari 5 orang boleh dikenakan penjara tidak kurang 6 bulan tetapi tidak lebih 5 tahun dan boleh dikenakan tidak lebih 6 sebatan.

Sepanjang tahun 2020, Jabatan Imigresen Malaysia telah melaksanakan sebanyak 634 operasi di rumah kongsi/tapak pembinaan. Seramai 14,659 orang warga asing telah diperiksa dan daripada jumlah tersebut seramai 4,852 orang PATI serta 62 orang majikan telah ditangkap. Bagi tahun 2021 iaitu sehingga 7 Oktober 2021, sebanyak 300 operasi telah dilaksanakan di rumah kongsi/tapak pembinaan. Seramai 6,449 orang warga asing telah diperiksa dan daripada jumlah tersebut seramai 2,439 orang PATI serta 20 orang majikan telah ditangkap.

Selain itu, Jabatan Imigresen Malaysia dan Jabatan Tenaga Kerja Malaysia turut mengadakan operasi bersepadu bagi memastikan pematuhan Akta Standard Minimum Perumahan, Penginapan dan Kemudahan Pekerja 1990 oleh majikan-majikan yang menggaji pekerja asing. Di samping itu juga, langkah mengadakan operasi dan pemeriksaan ditempat-tempat ini adalah bagi mengekang penularan wabak COVID-19 ekoran keadaan penempatan/rumah pekerja yang tidak sesuai untuk didiami dan berisiko menjadi punca kepada penularan wabak COVID-19.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB PUAN MARIA CHIN ABDULLAH  
(PETALING JAYA)**

**TARIKH : 26 OKTOBER 2021 (SELASA)**

**SOALAN**

**PUAN MARIA CHIN BINTI ABDULLAH [PETALING JAYA]** minta **MENTERI DALAM NEGERI** menyatakan berapa orang banduan akhir wanita setakat Oktober 2021 berdasarkan warganegara dan warga asing dan jenis kesalahan yang mereka dituduh atau disabitkan.

**JAWAPAN**

Tuan Yang Di Pertua,

Untuk makluman Ahli Yang Berhormat, rekod Jabatan Penjara Malaysia sehingga 01 Oktober 2021 menunjukkan bahawa terdapat seramai 128 banduan wanita yang telah disabitkan bersalah oleh Mahkamah dan dijatuhkan hukuman mati.

Daripada jumlah banduan akhir wanita tersebut, seramai 26 orang adalah warganegara Malaysia dan 102 orang adalah warganegara asing. Statistik Jabatan Penjara Malaysia menunjukkan seramai 113 banduan daripadanya melakukan kesalahan di bawah seksyen 39B Akta Dadah Berbahaya (pengedaran dadah). Manakala, di bawah seksyen 302 Kanun Kesiksaan (membunuh) pula terdapat seramai 15 banduan yang telah disabitkan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN YEO BEE YIN [BAKRI]**

**TARIKH : 26 OKTOBER 2021 (SELASA)**

**SOALAN**

**PUAN YEO BEE YIN** minta **MENTERI KESIHATAN** menyatakan jumlah warga asing berdokumen dan tidak berdokumen serta pendatang asing tanpa izin yang telah menerima vaksin COVID-19. Apakah langkah-langkah yang diambil oleh Kerajaan untuk memastikan kebanyakan mereka menerima vaksin.

**JAWAPAN**

Tuan Yang di-Pertua,

1. Program Imunisasi COVID-19 Kebangsaan mensasarkan sebanyak 80% daripada populasi dewasa negara divaksinasi, yang turut melibatkan populasi bukan warganegara. Sehingga 25 Oktober 2021, sebanyak 94.7% daripada populasi dewasa telah selesai divaksinasi.
2. Bagi pelaksanaan di Pusat Pemberian Vaksin (PPV), MOSTI menerusi COVID-19 *Immunisation Task Force* (CITF) telah mengeluarkan Garis Panduan Vaksinasi terhadap Bukan Warganegara. Pada masa ini, pelaksanaan vaksinasi bagi bukan warganegara yang berdaftar dalam sistem MySejahtera masih melalui penetapan temu janji namun sebagai usaha *mopping up* baki penerima yang masih belum mendapat vaksinasi, program *walk-in* termasuk di kalangan bukan warganegara yang tidak berdokumen telah dilaksanakan di kebanyakan negeri di seluruh Malaysia.
3. Berdasarkan kepada statistik pemberian vaksin COVID-19 kepada bukan warganegara, seramai 3.01 juta orang dewasa telah menerima sekurang-kurangnya satu dos vaksin manakala 2.34 juta orang dewasa telah menerima lengkap dos hingga 17 Oktober 2021. Program vaksinasi dalam kalangan bukan warganegara masih diteruskan pada masa ini.

Sekian, terima kasih.